

MALAYSIA
DEWAN RAKYAT
ATURAN URUSAN MESYUARAT

NASKAH SAHIH/BAHASA MALAYSIA

<http://www.parlimen.gov.my>

HARI ISNIN, 13 NOVEMBER 2017, PUKUL 10.00 PAGI

Bil. 46

PERTANYAAN-PERTANYAAN BAGI JAWAB LISAN

1. PR-1353-L02999
Dato' Dr. Haji Noor Azmi Bin Ghazali [Bagan Serai] minta **PERDANA MENTERI** menyatakan langkah Kerajaan dalam menangani isu penganiayaan terhadap Rohingya, apakah statistik dan taburan terkini pelarian etnik Rohingya di negara ini serta apakah ada unsur-unsur ancaman kepada keselamatan negara.
2. PR-1353-L03502
Dr. Hajah Siti Mariah Binti Mahmud [Kota Raja] minta **MENTERI PENDIDIKAN** menyatakan bilangan terkini penagih dadah dalam kalangan pelajar sekolah serta jenis dadah yang diambil. Nyatakan langkah-langkah yang sedang dan bakal diambil Kerajaan untuk membendung fenomena ini.
3. PR-1353-L03895
Datuk Rozman Bin Isli [Labuan] minta **MENTERI PERTANIAN DAN INDUSTRI ASAS TANI** menyatakan apakah perancangan jangka masa panjang Kementerian untuk menarik semula pengusaha tuna mendaratkan hasil tangkapan ke negara ini khususnya yang mendapat lesen atau kuota menangkap ikan tuna.
4. PR-1353-L03898
Tuan Mohamed Hanipa Bin Maidin [Sepang] minta **MENTERI KERJA RAYA** menyatakan :-
 - (a) di jalanraya manakah yang telah dikenal pasti sebagai kawasan yang sesak di Sepang khususnya di waktu pagi (pergi kerja) dan waktu petang (balik kerja); dan

- (b) apakah langkah-langkah yang sedang dan akan diambil untuk atasi masalah kesesakan tersebut.

5. PR-1353-L02989

Datuk Sapawi Bin Ahmad Wasali [Sipitang] minta **MENTERI KEWANGAN** menyatakan jumlah kes kebangkrutan di kalangan generasi muda berkaitan penggunaan kad kredit dan apakah langkah-langkah Kerajaan untuk membendungnya.

6. PR-1353-L02892

Dr. Azman Bin Ismail [Kuala Kedah] minta **MENTERI SUMBER ASLI DAN ALAM SEKITAR** menyatakan sebab-sebab projek Rancangan Tebatan Banjir di kawasan Kota Setar Kedah tergendala. Apakah rancangan selanjutnya Kementerian menangani masalah ini.

7. PR-1353-L03541

Dato' Ahmad Fauzi Bin Zahari [Setiawangsa] minta **MENTERI WILAYAH PERSEKUTUAN** menyatakan apakah bentuk kerjasama yang wujud antara pihak Kementerian dan Kementerian Pelancongan dalam usaha menarik lebih ramai lagi pelancong domestik dan luar negara ke Kuala Lumpur pada masa kini.

8. PR-1353-L03329

Tuan Tan Kok Wai [Cheras] minta **MENTERI WILAYAH PERSEKUTUAN** menyatakan keluasan tanah bangunan baru Jabatan Kesihatan Alam Sekitar DBKL yang dibina di Taman Tasik, Pudu Ulu dan Cheras, jumlah kos projek, kemajuan pembinaan, dan adakah pembinaan ditangguh dan dilewatkan. Jika ya, apakah sebab dan adakah ini akan menyebabkan kos bertambah dan penilaian semula projek terpaksa dibuat.

9. PR-1353-L03079

Datin Mastura Binti Mohd Yazid [Kuala Kangsar] minta **MENTERI BELIA DAN SUKAN** menyatakan adakah tinjauan oleh Global Shapers Survey, inisiatif oleh 'Worlds Economic Forum' mengenai isu-isu pilihan orang muda peringkat antarabangsa sama dengan isu-isu pilihan orang muda Malaysia.

10. PR-1353-L03445

Dr. Ko Chung Sen [Kampar] minta **MENTERI KESIHATAN** menyatakan :-:-

- (a) bilangan hospital yang didapati memerlukan perhatian segera selepas kejadian kebakaran di Hospital Sultanah Aminah; dan

- (b) berapakah wang yang diperlukan untuk membaiki, menaik taraf atau menggantikan hospital yang berkenaan dan berapakah amaun bayaran balik setahun diperlukan untuk menampung pinjaman dan faedahnya dan berapakah tempoh masa bayaran baliknya.

11. PR-1353-L03215

Dato' Sri Wee Jeck Seng [Tanjong Piai] minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan apakah inisiatif Kerajaan dalam memperkasakan usahawan francais memandangkan francais merupakan modal perniagaan terbaik di waktu ekonomi tidak menentu, terutama bagi mereka yang mempunyai wang dan berhasrat menceburkan diri dalam perniagaan tetapi tidak mempunyai pengalaman dan pengetahuan, misalnya mereka yang menerima Skim Pemisahan Sukarela (VSS).

12. PR-1353-L03846

Dr. Mohd Hatta Bin Md. Ramli [Kuala Krai] minta **MENTERI KEWANGAN** menyatakan sama ada pesanan baru untuk pembelian pesawat-pesawat Boeing 787 dan 737 bertujuan untuk menjadikan ia aset MAS atau untuk di sewa oleh MAS.

13. PR-1353-L03994

Dato' Haji Abdul Rahman Bin Mohamad [Lipis] minta **MENTERI SUMBER ASLI DAN ALAM SEKITAR** menyatakan adakah Kementerian sudah mempunyai satu dasar dan perundangan khas berkaitan maklumat geospatial telah disediakan bagi menjamin keselamatan dan kedaulatan negara.

14. PR-1353-L04075

Tuan Khalid Bin Abd Samad [Shah Alam] minta **MENTERI KEWANGAN** menyatakan perancangan Kerajaan untuk menerima atau menolak penggunaan wang kripto atau crypto currency yang sedang digunapakai di beberapa negara termasuk beberapa agensi di Malaysia.

15. PR-1353-L02886

Datuk Wilson Ugak Anak Kumbong [Hulu Rajang] minta **MENTERI KEMAJUAN LUAR BANDAR DAN WILAYAH** menyatakan :-

- (a) bilakah Jalan Kanowit-Song-Kapit siap ; dan
- (b) bilakah Jalan Nanga Mujong ke Putai, Baleh siap.

16. PR-1353-L03677
Ust. Dato' Dr. Mohd Khairuddin Bin Aman Razali [Kuala Nerus] minta **MENTERI PELANCONGAN DAN KEBUDAYAAN** menyatakan kepentingan arak dan sumbangannya kepada industri pelancongan dan pendapatan negara.
17. PR-1353-L02796
Dato' Wira Othman Bin Abdul [Pendang] minta **MENTERI KEWANGAN** menyatakan apakah benar MAS telah menjual 6 buah Airbus 380 dan 4 Boeing 777-200ER. Kalau benar, apakah sebabnya.
18. PR-1353-L03736
Dato' Seri Mohamed Azmin Bin Ali [Gombak] minta **MENTERI KEWANGAN** menyatakan apakah perincian cadangan pelaburan Kumpulan Wang Simpanan Pekerja (KWSP) di Amerika Syarikat memandangkan jumlah pelaburan asing KWSP di negara tersebut telah melebihi 58%.
19. PR-1353-L03199
Tan Sri Datuk Seri Panglima Haji Annuar Bin Musa [Ketereh] minta **PERDANA MENTERI** menyatakan perkembangan terkini berhubung kerjasama NBOS antara Kementerian dan agensi berkaitan dalam usaha menambah baik Institusi Pendidikan Tahfiz di negara ini.
20. PR-1353-L03961
Puan Hajah Fuziah Binti Salleh [Kuantan] minta **MENTERI PERTANIAN DAN INDUSTRI ASAS TANI** menyatakan apakah tindakan yang akan diambil oleh pihak Kementerian untuk membantu pekebun sayur di Sg. Soi yang selalu menghadapi kerugian kerana hasil tanaman sayur rosak akibat banjir.
21. PR-1353-L03111
Dato' Sri Abdul Manan Bin Ismail [Paya Besar] minta **MENTERI PERDAGANGAN ANTARABANGSA DAN INDUSTRI** menyatakan peluang-peluang dan segmen baru yang boleh diterokai oleh industri minyak dan gas tempatan khusus dalam aktiviti hiliran bagi menambah pasaran produk Malaysia sekali gus menjana pendapatan negara.
22. PR-1353-L03805
Tuan Haji Wan Hassan Bin Mohd Ramli [Dungun] minta **MENTERI PERTANIAN DAN INDUSTRI ASAS TANI** menyatakan jumlah import beras, sayur-sayuran, ikan, daging, susu dan input pertanian bagi tahun 2016.

23. PR-1353-L04029

Dr. Ismail Bin Daut [Merbok] minta **PERDANA MENTERI** menyatakan jumlah projek Perumahan Rakyat 1 Malaysia (PR1MA) yang telah siap. Adakah Kementerian bercadang untuk mengkaji semula dasar projek tersebut supaya ianya dapat dimiliki oleh golongan sasaran.

24. PR-1353-L03572

Tuan Budiman Bin Mohd Zohdi [Sungai Besar] minta **MENTERI KEWANGAN** menyatakan apakah bentuk-bentuk kejayaan yang telah dicapai menerusi penubuhan Pusat Inovasi dan Kreativiti Global Malaysia (MaGIC) dalam melahirkan golongan usahawan muda dan adakah terdapat apa-apa inisiatif khas yang dilaksanakan oleh MaGIC bagi memberi pendedahan kepada golongan muda luar bandar untuk menceburi bidang keusahawanan.

25. PR-1353-L03922

Tuan Haji Hasbi Bin Haji Habibollah [Limbang] minta **MENTERI DALAM NEGERI** menyatakan apakah Kementerian akan mengadakan lagi Ops Cantas untuk menangani masalah gengsterisme, judi haram, dadah secara amnya dan membanteras habis-habisan gejala syabu di Parlimen Limbang khususnya.

26. PR-1353-L03192

Dr. Mansor Bin Abdul Rahman [Sik] minta **PERDANA MENTERI** menyatakan berhubung dengan perkhidmatan 'hailing car' seperti uber dan grab, sejak kebelakangan ini terdapat beberapa kes samun dan mencabul dikaitkan dengan perkhidmatan ini. Jelaskan langkah yang diambil dalam menjamin keselamatan pengguna.

27. PR-1353-L03260

Tan Sri Dato' Seri Abd Khalid Bin Ibrahim [Bandar Tun Razak] minta **MENTERI PEMBANGUNAN WANITA, KELUARGA DAN MASYARAKAT** menyatakan adakah Kementerian mempunyai rancangan membentangkan satu kertas putih mengenai hasil kajian komprehensif merangkumi semua impak peningkatan warga emas dan cadangan solusi mampan agar Malaysia bersiap siaga mendepani cabaran krisis demografi ini tanpa menjejaskan kemakmuran dan kelestarian ekonomi serta kebajikan semua lapisan masyarakat.

28. PR-1353-L02923

Dato' Abdullah Sani Bin Abdul Hamid [Kuala Langat] minta **MENTERI DALAM NEGERI** menyatakan kedudukan pekerja asing yang berada di negara ini sehingga 31 Julai 2017.

29. PR-1353-L03166
Puan Rubiah Binti Haji Wang [Kota Samarahan] minta **MENTERI BELIA DAN SUKAN** menyatakan sejauh mana kerjasama Kementerian bersama-sama dengan agensi berkaitan dalam usaha mencungkil bakat baru sebagai pelapis atlet negara terutamanya kanak-kanak di kawasan pedalaman yang berpotensi namun kurang mendapat peluang.
30. PR-1353-L03261
Puan Nurul Izzah Binti Anwar [Lembah Pantai] minta **PERDANA MENTERI** menyatakan :-
- (a) apakah kadar jualan dan kependudukan perumahan PR1MA ; dan
 - (b) perancangan Kerajaan dalam menawarkan perumahan berkos rendah dan sederhana untuk memenuhi permintaan pasaran yang meningkat, khususnya di kawasan bandar .
31. PR-1353-L03916
Dato' Ir. Nawawi Bin Ahmad [Langkawi] minta **MENTERI KERJA RAYA** menyatakan apakah Kementerian bercadang mewujudkan garis panduan pengawalan bahu jalan, agar dapat mengurangkan kadar kemalangan jalan raya, kita ambil contoh pengawalan bahu-bahu jalan yang dilaksanakan oleh negara jiran, Thailand, mereka mengawal bahu-bahu jalan agar jalan kelihatan lebih besar.
32. PR-1353-L03970
Dato' Haji Mohd Fasih Bin Haji Mohd Fakeh [Sabak Bernam] minta **MENTERI KESIHATAN** menyatakan bilangan pesakit AIDS di kalangan berumur 15 hingga 40 tahun dan nyatakan setakat manakah pencapaian terkini negara dalam sasaran Fast-Track 90-90-90 dalam menangani HIV/AIDS di negara ini.
33. PR-1353-L03768
Dato' Abd Aziz Bin Sheikh Fadzir [Kulim Bandar Baharu] minta **MENTERI PENDIDIKAN** menyatakan apakah usaha Kementerian bagi mengatasi isu kekurangan guru bimbingan dan kaunseling di sekolah dengan nisbah seorang guru kepada 350 murid bagi sekolah rendah dan seorang guru untuk 500 pelajar bagi sekolah menengah sehingga masih terdapat banyak sekolah yang hanya melantik guru biasa yang bertindak sebagai kaunselor sedangkan seorang kaunselor perlu mendapat latihan dan pengalaman yang mencukupi bagi berhadapan dengan pelajar dan ibu bapa serta adakah kekurangan guru kaunseling di sekolah menjadi antara sebab kepada peningkatan kes pelajar melakukan aktiviti yang tidak bermoral dan jenayah.

34. PR-1353-L03721

Tuan Lim Guan Eng [Bagan] minta **MENTERI KEWANGAN** menyatakan sama ada pelaburan Amerika Syarikat akan terjejas dan menjadi lembap ekoran isu-isu berkaitan kaedah tukaran 75% kutipan daripada hasil jualan kepada luar negara kepada Ringgit Malaysia (RM) 'withholding tax', cadangan mengecualikan cukai untuk e-commerce dan kaedah baru untuk pensijilan halal bagi semua syarikat kelengkapan perubatan (medical devices).

35. PR-1353-L03461

Tuan Ignatius Dorell Leiking [Penampang] minta **PERDANA MENTERI** menyatakan apa sebabnya/alasan terperinci berkenaan dengan pindaan kepada Perlembagaan Persekutuan melalui Akta 354 di mana definisi asal Sabah dan Sarawak sebagai "The Borneo States" [Artikel 2 (b)] telah dimansuhkan dan di mana Sabah & Sarawak dimasukkan dalam definisi 'The States of the Federation' dan adakah Kerajaan sedia untuk menggubal pindaan kepada definisi asal seperti mana yang dipersetujui pada Penubuhan Persekutuan Malaysia seperti dalam "spirit & intent" Perjanjian Malaysia 1963.

36. PR-1353-L03062

Dato' Fauzi Bin Abdul Rahman [Indera Mahkota] minta **MENTERI PERTAHANAN** menyatakan langkah-langkah yang diambil untuk meringankan beban kenaikan kos sara hidup dan langkah-langkah yang diambil untuk menjaga kebajikan anggota-anggota tentera berpangkat rendah.

37. PR-1353-L03400

Dato' Sri Bung Moktar Bin Radin [Kinabatangan] minta **MENTERI KOMUNIKASI DAN MULTIMEDIA** menyatakan apakah perancangan pihak Kementerian dalam memastikan fokus Kerajaan yang menekankan kepada penerapan masa depan digital dan menarik penyertaan perniagaan tempatan untuk menjadi jaguh global dapat direalisasikan.

38. PR-1353-L03784

Tuan Idris Bin Haji Ahmad [Bukit Gantang] minta **MENTERI PERTANIAN DAN INDUSTRI ASAS TANI** menyatakan berapakah tanah sawah yang telah ditukar kepada tapak industri dan perumahan daripada tahun 2010 hingga 2016 dan apakah usaha untuk mengurangkan pergantungan kepada beras import .

39. PR-1353-L03339

Tuan Anyi Ngau [Baram] minta **PERDANA MENTERI** menyatakan rancangan dan tindakan yang berkesan mengatasi masalah kemiskinan rakyat di kalangan kaum minoriti di Negeri Sarawak dan kawasan Parlimen Baram khususnya berkenaan cabaran kemudahan asas seperti perumahan, jalan raya dan sebagainya.

40. PR-1353-L03655

Tuan Nga Kor Ming [Taiping] minta **MENTERI PENGANGKUTAN** menyatakan :-

- (a) adakah Kerajaan mempunyai rancangan membina lapangan terbang antarabangsa yang baru di Perak ; dan
- (b) jika ya, di mana tapak lokasi dan berapakah anggaran peruntukan yang terlibat .

41. PR-1353-L03388

Dato' Sri Douglas Uggah Embas [Betong] minta **MENTERI KEMAJUAN LUAR BANDAR DAN WILAYAH** menyatakan :-

- (a) berapakah jumlah peruntukan Projek Bekalan Elektrik Luar Bandar (BELB) Negeri Sarawak bagi tahun 2017 dan bagaimanakah pencapaian setakat ini; dan
- (b) adakah Kementerian mempunyai bantuan khas untuk rumah-rumah baru yang dikategorikan sebagai permohonan lewat di kampung dan rumah panjang yang sudah ada Talian Grid.

42. PR-1353-L03710

Tuan Nik Mohamad Abduh Bin Nik Abdul Aziz [Pasir Mas] minta **PERDANA MENTERI** menyatakan keadaan keselamatan di ESSZONE dan di perairan Laut China Selatan pada masa ini.

43. PR-1353-L03482

Dato' Dr. Tan Kee Kwong [Wangsa Maju] minta **MENTERI PENDIDIKAN** menyatakan adakah pihak sekolah boleh menganjurkan acara yang melibatkan Parti Politik sepertimana yang telah berlaku di sebuah sekolah di Presint 14 Putrajaya.

44. PR-1353-L02846

Tuan Jeff Ooi Chuan Aun [Jelutong] minta **MENTERI SUMBER ASLI DAN ALAM SEKITAR** menyatakan sama ada Kerajaan Persekutuan benar-benar telah meluluskan peruntukan Rancangan Tebatan Banjir sebanyak RM2.6 bilion yang dipohon oleh JPS Negeri Pulau Pinang. Kenapa hanya RM443 juta sahaja (yakni 17.1%) daripada peruntukan tersebut yang dibelanjakan setakat ini..

45. PR-1353-L04119

Tuan Manivannan A/L Gowindasamy [Kapar] minta **MENTERI PELANCONGAN DAN KEBUDAYAAN** menyatakan :-

- (a) usaha Kerajaan Persekutuan dalam melindungi warisan negara dan menjadikan warisan negara sebagai tarikan untuk menarik kedatangan pelancong ke negara kita. Apakah pendirian Kerajaan Persekutuan mengenai penemuan arkeologi di Sungai Batu, Kedah, dan jika ada, usaha yang akan dilakukan untuk melindungi bahan-bahan arkeologi itu; dan
- (b) apakah pelan Kerajaan Persekutuan untuk mengekalkan dan memelihara identiti dan sejarah masyarakat India seperti di Kedah (Lembah Bujang), Johor, Pahang dan beberapa lokasi lain di Malaysia.

46. PR-1353-L02967

Dato' Kamarudin Bin Jaffar [Tumpat] minta **MENTERI LUAR NEGERI** menyatakan usaha Kerajaan membantu menjayakan keputusan Hamas baru-baru ini untuk bekerjasama dengan pihak Fatah demi kemajuan perjuangan rakyat Palestin.

47. PR-1353-L03470

Tuan William Leong Jee Keen [Selayang] minta **MENTERI PERTANIAN DAN INDUSTRI ASAS TANI** menyatakan tahap pengeluaran beras mampu diri di Malaysia dan status sekuriti makanan.

48. PR-1353-L02803

Puan Zuraida Binti Kamaruddin [Ampang] minta **MENTERI KESIHATAN** menyatakan statistik setakat ini pesakit yang mengalami masalah mental.

49. PR-1353-L03644

Tuan Hee Loy Sian [Petaling Jaya Selatan] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan langkah mengatasi kesesakan tempat letak kereta di kawasan perumahan pangsapuri / flat kos rendah sehingga menyukarkan kenderaan bomba untuk memasuki perkarangan perumahan semasa berlaku kecelakaan.

50. PR-1353-L(5)00025

Tuan Ng Wei Aik [Tanjong] minta **MENTERI PENGANGKUTAN** menyatakan secara terperinci syarat-syarat yang telah dipersetujui di antara Penang Port Sdn. Bhd. (PPSB) dan Prasarana Malaysia Bhd. (Prasarana) bagi mengambil alih perkhidmatan feri Pulau Pinang. Senaraikan hutang dan liabiliti yang akan ditanggung masing-masing oleh PPSB dan Prasarana dan bilakah kerja-kerja pengorekan laut utama akan dijalankan oleh PPSB.

[Pertanyaan di bawah PM.22(5)]

ATURAN URUSAN MESYUARAT DAN USUL-USUL

1. (D.R.38/2017) Rang Undang-undang Perbekalan 2018 – **Menyambung semula perbahasan atas masalah, “ Bahawa Rang Undang-Undang ini dibacakan kali yang kedua sekarang, “ (9 November, 2017)**

DAN

Usul dibuat oleh YAB Menteri Kewangan dan masalah dicadangkan :-

“Bahawa Dewan ini, mengikut subseksyen 4(3) Akta Kumpulan Wang Pembangunan 1966 [Akta 406], membuat ketetapan iaitu suatu jumlah wang sebanyak tidak lebih dari empat puluh lapan bilion ringgit (RM48,000,000,000) dibelanjakan daripada Kumpulan Wang Pembangunan bagi tahun 2018, dan bagi tujuan dan butiran Perbelanjaan Pembangunan yang dinyatakan di bawah Maksud Pembangunan atau (“P”) dalam senarai Anggaran Perbelanjaan Persekutuan 2018, yang dibentangkan sebagai Kertas Perintah 24 Tahun 2017, adalah diuntukkan di bawah Maksud-maksud yang berkenaan jumlah-jumlah yang bersestentangan dengan butiran-butiran itu di ruangan enam dan tujuh senarai tersebut.”

Menyambung semula Perbahasan atas masalah (9 November, 2017)

2. (D.R.40/2017) Rang Undang-Undang Kewangan **Bacaan Kali**
(No.2) 2017 **Yang Kedua**

[Menteri Kewangan]

3. (D.R.42/2017) Rang Undang-Undang Cukai “
Pendapatan (Pindaan) 2017

[Menteri Kewangan]

4. (D.R.41/2017) Rang Undang-Undang Cukai Aktiviti “
Perniagaan Labuan (Pindaan) (No.2)
2017

[Menteri Kewangan]

5. (D.R.35/2017) Rang Undang-Undang Kemudahan dan Perkhidmatan Jagaan Kesihatan Warga Emas Swasta 2017-
Menyambung semula Perbahasan atas masalah, “Bahawa Rang Undang-undang ini dibacakan kali yang kedua sekarang” (26 Oktober, 2017)

[Menteri Kesihatan]

6. (D.R.36/2017) Rang Undang-Undang Pusat Jagaan **Bacaan Kali**
(Pindaan) 2017 **Yang Kedua**

**[Menteri Pembangunan Wanita,
Keluarga dan Masyarakat]**

7. PR-1353-U(27)008
Dato' Seri Haji Abdul Hadi Bin Awang [Marang] akan mencadangkan :-

"Bahawa Dewan ini memberikan kebenaran menurut Peraturan Mesyuarat 49 (1) kepada Yang Berhormat Ahli bagi kawasan Marang untuk mencadangkan suatu Rang Undang-undang Ahli Persendirian bernama Rang Undang-undang Mahkamah Syariah (Bidang Kuasa Jenayah) (Pindaan) 2016 seperti berikut:

Pindaan Seksyen 2

Akta Mahkamah Syariah (Bidang Kuasa Jenayah) 1965 [Akta 355] dipinda dalam proviso kepada seksyen 2 dengan menggantikan perkataan "penjara selama tempoh melebihi tiga tahun atau denda melebihi lima ribu ringgit atau sebatan melebihi enam kali" dengan perkataan "penjara selama tempoh melebihi tiga puluh tahun atau denda melebihi satu ratus ribu ringgit atau sebatan satu ratus kali sebagaimana ditadbir selaras dengan tatacara jenayah Syariah."

[Menteri di Jabatan Perdana Menteri]

8. PR-1353-U(27)070

Datuk Dr. Makin @ Marcus Mojigoh [Putatan] akan mencadangkan :-

"Bahawa Dewan ini mengambil maklum bahawa, terdapat banyak tapak-tapak warisan yang terdapat di negara ini mempunyai nilai-nilai sejarah, potensi ekonomi dan keunikan yang boleh dijadikan sebagai tapak warisan dunia UNESCO.

Dewan ini hendaklah juga mengambil maklum bahawa Taman Kinabalu (Kinabalu Park) dan kawasan pemuliharaan Lembah Danum (Danum Valley conservation area) adalah antara kawasan yang mempunyai potensi yang baik untuk dijadikan sebagai "UNESCO Global Geopark" dan "UNESCO World Heritage Site".

Dan mengambil maklum juga bahawa, dengan mensasarkan Taman Kinabalu sebagai UNESCO Global Geopark dan kawasan pemuliharaan Lembah Danum sebagai UNESCO World Heritage Site yang ke-3 buat negara Malaysia (selepas taman negara gunung Mulu dan taman negara Kinabalu), negara dengan secara langsung akan dapat menempatkan namanya di kaca mata dunia sama ada dari segi pemuliharaan dan penjagaan alam sekitar selain menjadi destinasi pelancongan ulung di rantau ini.

Maka, bagi mencapai matlamat ini, Dewan ini hendaklah mengambil ketetapan bahawa Kerajaan hendaklah segera mengambil segala usaha dan tindakan yang perlu agar usaha yang dibuat oleh Kerajaan negeri Sabah bagi matlamat ini segera dapat dicapai."

[Menteri Pelancongan Dan Kebudayaan]

9. PR-1353-U(27)071

Datuk Dr. Makin @ Marcus Mojigoh [Putatan] akan mencadangkan :-

"Bahawa Dewan ini mengambil maklum bahawa pewujudan dan pembinaan muzium warisan sesebuah masyarakat adalah merupakan satu bahan utama dalam menjaga bahan sejarah dan juga warisan mereka.

Dan mengambil maklum juga bahawa masyarakat cina telah memainkan peranan yang penting dalam pembangunan fizikal dan juga ekonomi negara malaysia sejak penubuhan negara ini khasnya di negeri Sabah.

Dan mengambil maklum juga bahawa masyarakat cina di Sabah bersama dengan rakyat tempatan telah "mengalirkan darah" mereka untuk mempertahankan negara ini terutama sekali dalam gerakan "Kinabalu Guerrillas" menentang pendudukan Jepun ketika perang dunia kedua, "Brunei Rebellion" dan "konferentasi", dimana mereka berkhidmat sebagai polis, tentera dan rangers pada ketika itu.

Dalam proses pembentukan negara ini, banyak peninggalan atau warisan masyarakat cina, yang tidak tersimpan, terpulihara atau didokumentasikan, maka tempat terbaik bagi tujuan ini adalah dengan menubuhkan muzium warisan masyarakat cina di Sabah khas.

Dan mengambil maklum juga bahawa negara asing seperti Indonesia juga telah membina muzium warisan hakka (cina) di Jakarta bagi menghargai dan mengiktiraf sumbangan masyarakat cina dalam pembangunan negara Indonesia.

Maka, bagi menghargai dan mengingati jasa masyarakat cina di negeri Sabah khasnya, dewan yang mulia ini hendaklah mengambil ketetapan bahawa kerajaan Malaysia hendaklah dengan segera menimbangkan untuk menubuhkan dan membina "muzium warisan masyarakat cina" di negeri Sabah agar ianya menjadi satu lagi tapak sejarah pembangunan negara."

[Menteri Pelancongan Dan Kebudayaan]

10. PR-1353-U(27)072

Datuk Dr. Makin @ Marcus Mojigoh [Putatan] akan mencadangkan :-

"Bahawa Dewan ini mengambil maklum bahawa penggunaan bahan bungkus dan bag hasil keluaran plastik adalah lebih banyak membawa kemudaran kepada manusia dan alam sekitar berbanding dengan manfaatnya.

Dan mengambil maklum juga bahawa semua jenis plastik adalah tidak mesra alam dimana hasil kajian mendapati bahawa plastik yang tertanam di bumi akan mengambil masa, tidak kurang daripada 25 tahun untuk terurai disamping merosakkan tanah dan saliran air/ sungai dan alam sekitar.

Dan mengambil maklum juga bahawa, bahan-bahan plastik ini juga merupakan antara punca penyebab kejadian banjir dimana ianya menyebabkan parit dan longkang tersumbat.

Dan mengambil maklum juga bahawa, terutama sekali di kawasan pantai, terdapat banyak sampah-sampah plastik yang terapung dan menjadikan tepi-tepi pantai hodoh dan kotor. Selain itu, bahan plastik yang terlepas ke lautan banyak merosakkan terumbu karang dan hidupan marin, terutama sekali penyu yang memakan bahan plastik kerana difikirkan sebagai obor-obor.

Maka, bagi menangani perkara-perkara yang boleh memudaratkan kehidupan manusia, alam sekitar dan hidupan marin, maka dewan ini hendaklah mengambil ketetapan bahawa penggunaan semua jenis pembungkus dan bag pembungkus berasakan plastik diharamkan."

[Menteri Sumber Asli Dan Alam Sekitar]

11. PR-1353-U(27)073

Datuk Dr. Makin @ Marcus Mojigoh [Putatan] akan mencadangkan :-

"Bahawa Dewan ini mengambil maklum bahawa Chinese Independent School di Malaysia menjalankan taksiran peperiksaan persekolahan mereka melalui sijil yang dikenali sebagai Unified Examination Certificate (UEC) yang mana dibahagikan kepada tiga peringkat iaitu Unified Examination Certificate - Junior Middle (UEC-JML), Unified Examination Certificate Vocational (UEC-V) dan Unified Examination Certificate Senior Middle (UEC-SML).

Dan mengambil maklum juga bahawa, persijilan UEC telah pun digunapakai dalam persekolahan oleh United Chinese School Committees Association of Malaysia sejak ianya diperkenalkan pada tahun 1975.

Dan mengambil maklum juga bahawa sijil UEC yang diperkenalkan oleh UCSCAM ini telah diiktiraf oleh universiti di serata negara seperti di United Kingdom, United States of America, Taiwan, Hong Kong, China, Australia, Canada, Singapore dan lain-lain negara.

Dan mengambil maklum juga bahawa malangnya, Kementerian Pelajaran dan Kementerian Pendidikan Tinggi Malaysia atau secara khususnya, Lembaga Akreditasi Negara tidak mengiktiraf sijil UEC ini terutama sekali bagi kemasukkan ke universiti awam Malaysia, walaupun National University of Singapore yang berkedudukan tempat ke-empat universiti terbaik di dunia mengiktiraf sijil UEC ini.

Dan mengambil maklum juga bahawa dengan ketiadaan pengiktirafan yang dimaksudkan di atas, negara Malaysia secara tidak langsung mengalami kerugian yang besar dimana pemegang sijil UEC ini terpaksa meneruskan pendidikan tinggi mereka di luar negara di mana aliran wang keluar daripada

negara ini dan juga kecenderungan lepasan sijil UEC ini untuk terus berkerja di luar negara adalah tinggi, di mana dalam hal ini negara Malaysia akan kerugian "aliran keluar" tenaga mahir ke luar negara.

Maka, bagi menangani masalah ini, dewan yang mulia ini hendaklah mengambil ketetapan bahawa Kerajaan haruslah dengan segera mengiktiraf sijil Unified Examination Certificate bagi manfaat negara."

[Menteri Pendidikan]

12. PR-1353-U(27)074

Datuk Dr. Makin @ Marcus Mojigoh [Putatan] akan mencadangkan :-

"Bahawa Dewan ini mengambil maklum bahawa, tahap penguasaan Bahasa Inggeris di kalangan murid dan graduan di negara ini adalah pada tahap yang amat minima dan keadaan ini telah menjadikan sumber tenaga manusia negara ini kurang berdaya saing di luar negara.

Dan mengambil maklum juga bahawa, kebanyakan bahan-bahan rujukan untuk pengajian yang terdapat di atas talian dan buku-buku rujukan adalah dalam bahasa Inggeris.

Mengambil maklum juga bahawa oleh kerana tidak dapat bertutur dan menulis dalam bahasa Inggeris dengan baik, sumber tenaga manusia dan para graduan dari negara Malaysia tidak berpeluang untuk berkerja dan bersaing di peringkat global.

Dan mengambil maklum juga bahawa sumber tenaga manusia daripada negara-negara yang membenarkan penggunaan bahasa Inggeris dalam sistem pembelajaran mereka, misalnya negara Filipina, adalah lebih mendapat pasaran tenaga kerja di peringkat antarabangsa.

Mengambil maklum juga bahawa, Kerajaan hendaklah mengambil kira saranan ramai ibubapa, agar Kerajaan mewujudkan sekolah menengah dengan bahasa Inggeris sebagai bahasa penghantar bagi membolehkan anak-anak mereka menguasai bahasa Inggeris dengan baik agar kebolehpasaran anak-anak mereka dipertingkatkan.

Mengambil maklum juga bahawa sekolah menengah La Salle Tanjung Aru Sabah telah menggunakan bahasa Inggeris sebagai bahasa penghantar sejak penubuhannya pada tahun 1903 sehinggalah dimansuhkan pada lewat tahun 1970an.

Maka, bagi menangani masalah ini, dewan yang mulia ini hendaklah mengambil ketetapan bahawa Kerajaan haruslah dengan segera meluluskan penubuhan sekolah menengah aliran bahasa Inggeris, sekurang-kurangnya satu sekolah menengah di setiap kawasan Parlimen sebagai permulaan dan bagi kawasan Parlimen P.173 Putatan, sekolah menengah La Salle Tanjung Aru sebagai perintis."

[Menteri Pendidikan]

13. PR-1353-U(27)077

Dr. Lee Boon Chye [Gopeng] akan mencadangkan :-

"Bahawa Suruhanjaya Pilihan Raya melaksanakan pendaftaran pengundi secara automatik mengikut data di Jabatan Pendaftaran Negara."

[Menteri di Jabatan Perdana Menteri]

14. PR-1353-U(27)078

Dr. Lee Boon Chye [Gopeng] akan mencadangkan :-

"Bahawa pengambilan pekerja asing dikurangkan serta merta untuk memberi peluang pekerjaan kepada pekerja tempatan."

[Menteri Sumber Manusia]

15. PR-1353-U(27)079

Dr. Lee Boon Chye [Gopeng] akan mencadangkan :-

"Bahawa Majlis Bahasa Brunei-Indonesia-Malaysia diaktifkan semula untuk memajukan penggunaan Bahasa Melayu."

[Menteri Pendidikan]

16. PR-1353-U(27)081

Tuan Liew Chin Tong [Kluang] akan mencadangkan :-

"Bahawa Dewan ini menggesa bahawa Laporan penuh Jawatankuasa Siasatan Bebas mengenai kejadian kebakaran Hospital Sultanah Aminah Johor Bahru pada 25 Oktober 2016 hendaklah diumumkan untuk makluman dan pengetahuan rakyat tentang punca-punca berlakunya kebakaran tersebut.

Kerajaan juga didesak untuk menyatakan langkah-langkah yang akan diambil untuk mencegah dan mengelakkan tragedi kebakaran berulang lagi di mana-mana hospital atau pusat perubatan. "

[Menteri Kesihatan]

17. PR-1353-U(27)082

Tuan Liew Chin Tong [Kluang] akan mencadangkan :-

"Bahawa Dewan ini menyokong cadangan menetapkan sebarang pembelian aset atau sistem pertahanan yang melebihi 100 juta oleh Kementerian Pertahanan, mesti dibawa ke Parlimen dibahas dan diaudit oleh Jabatan Audit Negara supaya untuk syarat meneruskan pembelian ini. Ini juga bertujuan untuk mempertingkatkan integriti dan keberkesanan pembelian sistem pertahanan. Ini adalah diakibatkan oleh pembelian Kapal Selam Scorpene telah menimbulkan banyak persepsi negatif terhadap negara."

[Menteri Pertahanan]

18. PR-1353-U(27)084

Tuan Liew Chin Tong [Kluang] akan mencadangkan :-

"Bahawa Dewan ini memuatkan semua Jawapan-Jawapan Pertanyaan Jawab Lisan Harian Yang Tidak Dapat Dijawab, Jawapan-Jawapan Pertanyaan Bertulis, serta Undi-Undi dan Perjalanan Mesyuarat (Votes and Proceedings) bagi Dewan Rakyat dan Dewan Negara ke dalam portal rasmi Parlimen Malaysia untuk memastikan ketelusan Parlimen. "

[Menteri di Jabatan Perdana Menteri]

19. PR-1353-U(27)086

Tuan Hee Loy Sian [Petaling Jaya Selatan] akan mencadangkan :-

"Bahawa Dewan ini mengambil maklum bahawa Kerajaan Malaysia bukan anggota kepada Konvensyen 1951 dan Protokol yang berhubung dengan Pelarian. Sungguhpun demikian, kad UNHCR diterima sebagai dokumen yang sah bagi pelarian yang datang termasuk dalam urusan bekerja secara bebas di negara ini sehingga ada usaha-usaha dalam memalsukan kad tersebut bagi melepaskan diri mereka daripada ditangkap pihak berkuasa. Maka Dewan yang mulia ini hendaklah menjelaskan tanggungjawab yang diberikan kepada pemegang kad tersebut dan sekiranya benar ianya mengizinkan pelarian yang mempunyai kad kuasa tersebut bekerja di negara ini."

[Menteri di Jabatan Perdana Menteri]

20. PR-1353-U(27)087

Tuan Fong Kui Lun [Bukit Bintang] akan mencadangkan :-

"Dewan ini mencadangkan Kerajaan supaya mempergiatkan usaha untuk menyatupadukan rakyat berbilang kaum di Malaysia yang kelihatan masih lemah dan longgar meskipun negara telah menjadi negara merdeka dan berdaulat sejak 60 tahun lalu supaya mereka boleh hidup dengan aman dan saling memerlukan dan memahami bagi memudahkan mereka membangunkan ekonomi negara secara bersama dan merealisasikan impian Malaysia."

[Menteri di Jabatan Perdana Menteri]

21. PR-1353-U(27)088

Tuan Fong Kui Lun [Bukit Bintang] akan mencadangkan :-

"Dewan ini mencadangkan Kerajaan memulihkan pilihan raya Kerajaan tempatan seluruh negara supaya urus tadbir Kerajaan menjadi lebih cekap, akauntabiliti dan bersih dengan mengambil langkah pertama untuk membuat kajian serius dan melakukan pungutan suara antara rakyat."

[Menteri Kesejahteraan Bandar, Perumahan Dan Kerajaan Tempatan]

22. PR-1353-U(27)089

Dr. Tan Seng Giaw [Kepong] akan mencadangkan :-

"Bahawa Dewan ini membahaskan keberkesanan untuk mencegah kebakaran di Malaysia."

[Menteri Kesejahteraan Bandar, Perumahan Dan Kerajaan Tempatan]

23. PR-1353-U(27)090

Tuan Manivannan A/L Gowindasamy [Kapar] akan mencadangkan :-

"Bahawa Dewan ini mempertimbangkan cadangan untuk menghalang dan mengharamkan penjualan arak murahan (cheap liquor) secara mudah dan murah yang semakin berleluasa. Gejala pengambilan arak murahan ini menimbulkan pelbagai masalah sosial seperti keganasan rumah tangga dan gengsterisme serta merosakkan organ dalaman. Di samping itu, kawalan dan penyeliaan terhadap kedai-kedai menjual arak perlu diketatkan. Masa penjualan arak dan lokasi minum arak perlu dikaji. Kawasan tempat awam seperti di taman awam dan taman permainan kanak-kanak, minum arak wajib diharamkan. Dewan ini juga wajib mempertimbangkan penubuhan Pusat Pemulihan Arak (PPA) di setiap negeri di Malaysia untuk membendung masalah minum arak yang semakin berleluasa di kalangan anak muda merentasi sempadan bangsa dan agama."

[Menteri Kesejahteraan Bandar, Perumahan Dan Kerajaan Tempatan]

24. PR-1353-U(27)091

Tuan Manivannan A/L Gowindasamy [Kapar] akan mencadangkan :-

"Bahawa Dewan ini mempertimbangkan cadangan untuk kes kematian di bawah tahanan Polis DiRaja Malaysia, keluarga simati diberi kebenaran sepenuhnya untuk memperoleh Pakar Perubatan Forensik sendiri bagi mewakili pihak keluarga simati semasa bedah siasat dijalankan."

[Menteri Dalam Negeri]

25. PR-1353-U(27)094

Tuan Nga Kor Ming [Taiping] akan mencadangkan :-

"Bahawasanya Dewan yang mulia ini meluluskan satu ketetapan supaya YAB Perdana Menteri dan seluruh anggota Menteri Kabinet mengisytiharkan harta dan aset mereka kepada Dewan Rakyat tiap-tiap tahun pada bulan Disember."

[Menteri di Jabatan Perdana Menteri]

26. PR-1353-U(27)096

Tuan Nga Kor Ming [Taiping] akan mencadangkan :-

"Bahawasanya Dewan yang mulia ini meluluskan satu ketetapan selaras dengan titah Majlis Raja-Raja Melayu dimana Akta Majlis Keselamatan Negara 2016 dibentang dan dikaji semula di Dewan Rakyat dengan kadar segera."

[Menteri di Jabatan Perdana Menteri]

27. PR-1353-U(27)092

Tuan Manivannan A/L Gowindasamy [Kapar] akan mencadangkan :-

Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gejala sosial yang kian meningkat dan berleluasa akibat daripada kegagalan sistem pendidikan di Malaysia.

[Menteri Pendidikan]

28. **Dato' Johari Bin Abdul [Sungai Petani]** akan mencadangkan :-

"Bahawasanya Dewan mendesak supaya Menteri di Jabatan Perdana Menteri yang bertanggung jawab terhadap Hal Ehwal Islam memanggil semua Mufti-mufti di semua negeri untuk berbincang dan membuat ketetapan bagaimana Jabatan-jabatan Agama Islam di setiap negeri mesti memainkan peranan utama dalam memerangi kegiatan judi yang makin tidak terkawal di seluruh negara.

Mufti-mufti mesti mengarahkan semua Pejabat Agama di setiap daerah mewujudkan “task force” bagi memantau kegiatan judi dan melaksanakan tugas seperti mana Pejabat Agama berjaya mengawal orang Islam yang tidak berpuasa makan di khalayak ramai.”

[Menteri di Jabatan Perdana Menteri]

29. **Dato' Johari Bin Abdul [Sungai Petani]** akan mencadangkan :-

“Bahawa Dewan ini meminta Kerajaan Pusat lebih giat memantau kegiatan penebangan balak di negeri-negeri yang akhir-akhir ini telah mengakibatkan banjir besar dan tanah runtuh. Jabatan Hutan dan lain-lain agensi yang dipertanggung jawabkan mengawal kegiatan pembalakan mesti diberi peruntukan yang cukup serta dibantu dengan aset yang terkini agar tugas mereka lebih cekap dan efisien.”

[Menteri Sumber Asli dan Alam Sekitar]

30. **Dato' Johari Bin Abdul [Sungai Petani]** akan mencadangkan :-

“Bahawa Dewan ini menyokong segala usaha yang sedang giat dilakukan oleh Ketua Pesuruhjaya Suruhanjaya Pencegahan Rasuah Malaysia (SPRM), Tan Sri Dzulkifli Ahmad dalam memerangi rasuah di semua peringkat. Dewan juga menyokong agar peruntukan kewangan, penambahan aset dan kakitangan yang mencukupi diberikan kepada SPRM supaya segala usaha yang sedang dijalankan tidak terbantut.”

[Menteri di Jabatan Perdana Menteri]

31. **Dato' Johari Bin Abdul [Sungai Petani]** akan mencadangkan :-

“Bahawa Dewan ini menggesa supaya Pengerusi MARA yang baru dilantik, Datuk Seri Awang Adek Hussin menjadi seorang Pengerusi yang tegas dan berwibawa. Beliau mesti meletakkan kepentingan Melayu dan Bumiputra teratas dan jangan melindungi sesiapa juga yang pernah melakukan penyelewengan semasa berkhidmat dengan MARA termasuk mantan Pengerusinya. Dengan pengalaman yang beliau dalam dalam berbagai bidang dan sektor rakyat sedang menanti perubahan yang bakal beliau lakukan.”

[Menteri Kemajuan Luar Bandar dan Wilayah]

RISALAT-RISALAT YANG DIBAWA KE DALAM MESYUARAT
(DEWAN RAKYAT)

<u>TAHUN</u> <u>2017</u>	<u>RISALAT/DOKUMEN</u>	<u>TARIKH</u> <u>DIBENTANGKAN</u>
ST.66	Laporan Tahunan dan Penyata Kewangan Majlis Pembangunan Wilayah Ekonomi Pantai Timur (ECERDC) Bagi Tahun 2016	13 November 2017
ST.68	Laporan Tahunan Suruhanjaya Pengangkutan Awam Darat (SPAD) Bagi Tahun 2016	13 November 2017

****UCAPAN-UCAPAN
(PERATURAN MESYUARAT 17 BAHARU)
(KAMAR KHAS)**

Tarikh Ucapan	Ahli Yang Berucap	Tajuk Ucapan	Menteri Yang Bertanggungjawab
1. 13.11.2017 (Isnin)	1. YB Tuan Hee Loy Sian (Petaling Jaya Selatan)	1. Masalah Kesesakan Lalulintas Di Persimpangan Lampu Isyarat NPE Dengan Jalan Templer, Petaling Jaya	1. YB Menteri Kerja Raya
2. 13.11.2017 (Isnin)	2. YB Puan Teo Nie Ching (Kulai)	2. Pengalaman Adik Neo Joe Yee Di Hospital Pantai, Batu Pahat	2. YB Menteri Kesihatan

**** Ucapan Di Bawah Usul Berkenaan Perkara Tadbir Kerajaan (Peraturan Mesyuarat 17 Baharu)**